

唐
文
續
拾

文續拾卷十六

榮祿大夫二品頂戴前分巡廣東高廉道加四級

臣

陸心源輯

管原道眞

道眞日本從五位上式部少輔兼文章博士行左大
辨春宮大夫

爲族曾祖姑製服并令素服議

檢開元禮曰皇帝本服大功以上親喪皇帝不視事
三日又曰總麻三月成人正服爲族曾祖姑在室者
報皇帝所絕傍親無服者皇帝皇子爲之降一等又
案本朝令曰皇帝二等以上親若散一位喪皇帝不

視事三日三等以上親百官三位以上喪皇帝皆不
視事一日義解日不視事三日者唯爲三月以上服
故也然則大皇太后者皇帝之族曾祖姑天子之宜
無服制者也故本朝不列五等之親親遠也唐制猶
分義理雖及半分文辭甚以鄙劣者又准之不第然
則上上之第令條可尋中上之科前例非昧不第之
絕三月之服服輕也明知皇帝廢事證據無文天下
素服因循不例唯大皇后之尊名內親王之貴種禮
制雖無正文同家宜有別議元慶三年三月二十五
日

定太政大臣職掌有無并史傳之中相當何職

議

臣某謹案記傳文書無大政大臣之文惟本朝職員令義解曰大政大臣卽是有德之選非分掌之職爲無其分職故不稱掌如此文者先師之釋更無可疑又案漢書表云相國掌承天子助理萬機丞相同之太尉太師太保皆在其下後漢書志曰太傅上公一人掌以善導無掌職太尉司徒司空共在其下晉書志云丞相非常人臣之職相國同之太宰太傅太尉司徒司空並在其下宋書志曰太宰所以訓護人主

導以德義也太傅太保同之就此等文案之相國太傅丞相太宰等位冠百僚掌殊常職本朝大政大臣可當漢家相國等又大唐六典曰三師訓導之官大抵無所統職無其人則闕之三公論道之官無所不統故不以一職名其官已曰無所統職又稱無其人則闕之可以唐三師當大政大臣唯我朝制令之意大乖大唐令條何者唐令三師三公獨專其官不備尚書省之官員我朝大政大臣雖無分掌猶爲大政官之職事斯其所爲大乖也元慶八年五月九日

爲藤大納言請減職封半狀

右臣氏宗伏奉恩旨忝授大納言身居非據位在具
瞻銜膽棲冰懼無與二重以就列槐棘封戶八百割
土之賞臣既知其不功欺天之罪臣未計其所避鬼
神惡盈況於人乎望請職封之中半將資公府之禮
節唯所遺歲入猶足又伏臘還恐朝家以臣爲不知
分量矣不勝懇款抗言以聞貞觀八年

爲右大臣請解左近衛大將狀

右臣氏宗言先修表狀辭讓重仍愚誠雖盡遂不聽
省兢悚之深心肝如刻大將者國之弓馬君之爪牙
也若無其人國失兵機君失武備焉氏宗泛覽官寺

點閱府寮或有缺職連年猶無害者或有空官數月而無憂者至于宿衛豈夫可然古之聖人安不忘危先聲之談自備非常氏宗老病相迫筋力已衰月弦暗委埃塵霜鏘空懸蒲柳三思既畢十上何勞不獨營已專資忠國伏願特蒙天鑑避路後賢貞觀十年四月十二日

爲源相公請罷右衛門督狀

右金吾之職位望惟崇臣忝得居其任皇恩不可以測臣自去春首臥病私門未效藥石之一功已見風景之三改仰思鳳闕悲不重趨空撫龍泉恨無再帶

伏望殊降鴻恩幸垂天量解罷臣職消損物譏若今
遊魂可招以息殘氣得養而留然後輸懇誠於明時
竭忠節於聖代不堪至情修狀以聞貞觀十二年

爲源相公重請罷右衛門督狀

右臣生去十五日修狀伏請罷右衛門督精誠不達
天聽逾高臣之愚款抑而不許臣病根差結藥石無
功效之期魂氣旣浮衣冠斷趨拜之望若帶官班空
填溝壑不唯負譏於下地亦將得罪於皇天臣盡命
重蘇之時枯骨重肉之口灰身粉骨是臣願也伏望
特播弘仁再迴聖慮恩詔一降察臣累聞不堪懇至

重修表狀貞觀十二年

爲右大辨藤原山陰朝臣請罷所職狀

右臣山陰謹奉去月廿九日詔命以臣任右大辨心
肝失據冰谷增危臣業廢文章性無政事幸過覆燾
之包容久偷祿位之過溢况官惟崇望職卽要機量
其力思其列顯臣朱愚累臣白罪加之臣先上表狀
請罷右近衛權中將慮無他貳專志在侍太上天皇
誠概纔通適賜寬裕今當此重任更追先請人臣之
節貴其有終犬馬之情何爲默止伏願殊迴照覽解
罷所職蒼天蒼天察臣懇款不堪屏營之至冒昧以

聞臣山陰誠惶誠恐頓首頓首死罪死罪謹言貞觀九年閏二月十日

請參議之官定爲職事狀

右伏見今之參議古之觀察使也考錄無法官位不明謹案續日本紀曰大寶二年四月從三位大伴宿彌安麻呂正四位下粟田朝臣真人從四位上向朝臣麻呂從四位下下毛野朝臣古麻呂小野朝臣毛野參預朝政本官如故又省去大同二年五月四日問曰觀察使無官位相當仍不注兼字而或云可注兼字何以爲正明法博士讚岐廣直答曰雖無相當

官員既備仍須注兼字弘仁七年六月廿五日問曰
未得解由之參議者預釐務□□判事物部敏久答
曰參議之號不載令條但大政官去延歷八年八月
廿日下民部省符得省今月十三日解備被大政
官去六月一日符稱參議正三位佐伯宿彌今毛人
去月十日致仕已畢省宜承知依例施行者仍檢案
內無有依致仕賜收參議封之例今不知行狀謹請
處分者被右大臣宣傳奉敕宜准職封減半自今以
後永爲恆例者今據此符參議准職事例然則未得
解由不預釐務同十三年四月十三日問曰前太宰

帥參議從三位多治比眞人身帶參議不預他職考
祿之法未知所云明法博士興江繼人答曰大寶二
年始敕任參議朝政然則可謂職事准據令條可預
考祿但相准官位事須處分夫則大寶初置之日卽
云本官如故大同決疑之時又曰須注兼字又未得
解由之人不預釐務不帶他職之輩可給考祿之狀
明法曹司勘申先畢加之頃年之例自職事拜參議
者至兼本官必有宣旨遭喪解任之徒奪情復任亦
降勅旨况所食者職事之封所載者除日之簿號之
職事所據非少但格式未立考祿馬斷之法官猶無

相當行守之文此其或可論非職事之故也若果謂非職事則三位參議不帶餘官者當無家司所以爲非職事三位也爰知可稱職事所據已多論非職事或有牴牾望請被定官位考祿等之式永爲職事之官謹奏元慶六年七月一日爲式部少輔爲省修此狀

請秀才課試新立法例狀

策問徵事可立限例事

右考課令曰凡秀才試方略策二條謹案此令問條有限徵事無期仍天長以往一問之中多者四事少

者三事尤少者每問載一事纔足於二問通而計之
遂留二事承和以來二條之內少則十二義多則十
六義至多則一句含數義猶謂之一微分以言之已
及三十義後文前質理固雖然陳力展材何無程里
請立新制將勸後賢

律文所禁可試問否事

右職制律曰凡玄象器物天文圖書讖書兵書七曜
歷太一雷公式私家不得有違者徒一年注曰私習
亦同然則律條所制不得貯其書亦無習其術已云
不習何備試問唯年來之例被勅策問者題下問中

時觸禁忌然而問者無辜對者無咎此問之事可謂
生常今之學者動設巢窟不獨安己將又窺人假令
問者依例適發其微對者固稱畏法不習則得否之
決將至申訴訴者稍得其理問者反坐其罪罪科之
閒不可不慎請豫降處分令問答如流

對策文理可詳令條事

右考課令曰文理俱高者爲上上文高理平理高文
平爲上中文理俱平爲上下文理粗通爲中上文劣
理滯爲不第謹案文辭甚美義理皆通者所謂上上
也文辭差鄙義理共滯所謂不第也又檢前例文辭

雖非綺靡披瀆頗無大害義理雖非全通所對纔及
半分者謂之文理粗通文辭雖有可觀義理不及半
目則令條前例共無可救唯至上中之文平理平上
下之文理共平偏案令文難可會釋更據前例又無
準的請詳釋令條明立流例不令詳定之官有所迷
謬

以前條事如件臣某職忝銓衡官兼貢舉謂試評判
苟居其任况秀才者國家之所重策試之道不敢爲
輕至件三事迷途未辨伏請處分謹奏元慶七年六
月三日

勘奏神泉宛白麕狀

右謹案史記平準書漢武帝時上林苑有白鹿以發瑞應又孝經援神契曰德至鳥獸則白鹿見宋均注曰應宴嘉賓然神泉者古之上林苑嘉賓者則今之渤海客以今稽古應在明時圖譜所存宜爲上瑞臣伏奉勅勘申如右謹奏

爲侍從等請引駒日賜幄座狀

右侍臣之職陪從惟務大小宴遊座席隨設唯至引駒未有前例雖然當日早朝會集本所乘輿初出行列如常比至馬場出居大夫高昇殿上辨少訥言引

就幄中諸衛府并臨時候階下之輩各有所守容身
就地自餘侍從東西分散及還本宮不遑赴集所司
每加嚴呵閉口不敢措詞尋其所以怠由無座望請
別賜幄座將備祗候送日之資儲在本局事須遞相
往還不空幄下晚頭就例陳力無疲謹請處分元慶
七年四月一日

請被補文章博士一員闕共濟雜務狀

右謹檢大學諸道博士明經之學所習惟大故官無
暫曠五人全備算明法書音等生徒雖少常補二員
文章則學業非小於明經博士猶同於書算非唯乏

少又闕一員某天性之暗人人難堪方今碩學成列
既有其人伏望被補件闕共濟雜務元慶八年二月
廿五日

為在中納言謝民部卿狀

右臣行平伏奉今月九日詔旨以臣為民部卿恩暄
冬日懼切春冰三省而慙一身無厝臣謹檢人民損
益倉庫盈虛雖繫國吏之常憂復關所司之明察故
既往任此職者皆是詳通政事廣蹈吏途僉曰之容
具瞻所屬而已臣累佩銀魚久忍尸素縱期粉骨已
無才智之可施空叩丹心唯有老病之相迫上畏玄

鑒下愧蒼生伏願陛下曲迴聖恩罷臣所職勿俾微
臣爲天工之盜機要爲閑曠之官元慶八年三月廿
一日

請解職狀

右臣某伏奉昨日任藏人頭之勅旨夢中之想經曉
猶迷冰上之行向春欲陷臣謹檢近代之例天安藤
原良繩貞觀藤原家宗同山陰仁和平正範藤原有
穗源元當代藤原時平同高經源希等或出自潢流
或生於鼎族其德也堪守芝蘭之種其威也足率鸞
鳳之羣未有凡夫懦士之能當此任以遺其名者矣

臣罷官南海歸命北辰枯苑更華死骨重肉馴闕下
而趨拜分已無涯列侍中以周旋恩何不趨古人云
服之不衷身之災也臣自謂褊衣短裳亦復慎之况
其職之乖人望乎况乎其任之違天量乎伏願聖主
陛下停臣所掌更選其人勿俾跛狎妄觸仙欄腐鼠
初汗禁省而已縱使臣淩崩浪於鼈頭臣豈敢辭命
縱使臣蹈畏途於虎尾臣豈敢惜身唯此非據之職
臣之所不知也寬平三年二月卅日

重請解職狀

臣不堪伴職之狀以去二月卅日上奏右少辨希傳

勅旨云事須先舉可晉之人然後辭退件職又奉口
勅云早從職掌不得闕怠自爾以來漸十六日進退
周旋莫不違禮奉行宣下皆斯失常加以某去三月
九日任式部少輔今日兼左中辨此兩箇職
過分踰涯况復直瀧口撰書之所候御前侍讀之喚
所帶者二官所勤者兩役虛瑣之才難可兼濟望請
特被殊優將解件職然則寵光之中暫全傷翅恩澤
之下久養枯鱗不堪至誠重請處分寬平三年四月
二十五日

請令諸公卿議定遣唐使進止狀

謹案在唐僧中瓘去年三月附商客王訥等所到之錄記大唐凋弊載之具矣更告不朝之間終停入唐之人中瓘雖區區之旋僧爲聖朝盡其誠代馬越鳥豈非習性臣等伏檢舊記度度使等或有渡海不堪命者或有遭賊遂亡身者唯未見至唐有難阻飢寒之悲如中瓘所申報未然之事推而可知臣等伏願以中瓘錄記之狀遍下公卿博士詳被定其可否國之大事不獨爲身且陳款誠伏請處分寬平六年九月十四日

請令議者反覆檢稅使可否狀

檢稅使始議之日臣奏曰臣所見只讚岐一國也以
彼國之風論之若遣此使者頗有物煩歟其日大納
言源朝臣以下二三人同有不快之氣其後令重議
之場大納言奏所勘定剩物之內若半分若三分一
適被返給于事無妨參議源希朝臣等意雖無所專
許偏被引公益遂無所因難臣某亦復如是其後使
定之日臣須暫諫止其點使事盡愚心以窮可否而
未得量決之間依有所疑猶豫不奏議畢之後伏思
起慮欲罷不能其間一兩治國能知政術者乍聞此
事無不愁悶越前守小野朝臣葛絃等是也又大納

言以下雖奏無妨之狀于今猶有內難臣厚蒙國恩
早昇高官人之所不安曾不可隱忍凡此議初起之
由爲勘出帳外之剩物以相補國用之不足也以名
言之公益甚多臣始不固難之故是也以實論之物
煩不少臣今所重請是也何者天下諸國其俗各雖
小異其政孰非一同況乎世衰國弊民貧物乏是故
或國司乖文法以迴方略違正道以施權議雖動不
爲已其事皆犯法臣今舉三條之否謹待一覽之用
復奏囚人拘放狀

右臣某月十三日謹奉口勅云去十日令檢非違使

別當從三位中納言兼行左衛門督源朝臣勘錄左
右獄中繫囚之數十一日錄奏既訖須朕親到獄對
放遣而德不及古事未宜今汝者朕之近習也大師
也列見罪人依實拘放令如朕之所念者臣伏奉勅
旨十三日早朝率從五位上守左少辨源朝臣唱大
外記正六位上多治有友左大史正六位上大原史
氏雄等會集右衛門府升殿于時左右檢非違使佐
以下召列罪人等祗候南門外大路臣召使等先令
辨申所犯輕重使等勘會日記過狀一一執申其犯
重其罪明者十六人左十一人
右五人二人先死其遺十四

人卽加防援各還本獄其犯有疑其罪未定者四十

六人

左二十八人
右十八人

令使等計列南門之前臣率辨以

下及檢非違使等著門中壇上胡床卽口宣曰奉勅
罪人汝等或被疑殺人傷人強盜竊盜或被告僞印
強奸投石放火如是等罪科法有限今如聞有司搜
實情之間空送二三年獄官尋證驗之內縱經五六
月須雖累年序雖積旬月愜定其犯明立其罪任理
出入隨事拘放然而別有所念直以放免汝等重有
所犯後日曾不寬宥者罪人等其稱唯或伏地嗚咽
或仰天嗟歎勅使府官道路見聞不勝感泣拭淚而

歸臣某頓首頓首死罪死罪伏錄事狀寬平八年七
月中納言

爲藤相公請罷職狀

右臣高藤謹言臣伏奉去年十月二十六日詔旨以
臣被任參議之列臣激勵愚性扶持病身晨昏備員
左右從事而衰老迫來宿疴彌倍計不上則拜除之
後及三百日量其力則尪弱之中過六十年縱使皇
恩忍以無咎如何天鑒明而不容思之顧之以畏以
慎伏願特降寵光罷臣參議不勝至款修狀抗聞寬
平八年某月某日參議從三位行近江守臣藤原朝

臣高藤

請特授從五位上大內記正六位上藤原朝臣

管根狀

右臣某謹尋事意去寬平五年四月二日東宮之始
太上天皇勅臣曰此般東宮每事省略仍二員學士
闕而不補汝已任亮兼供執經云云臣頃伏奉綸旨
一身兩役而所守忽劇遂違勅命爰至于十月以臣
不遑執經之狀奏聞太上帝即舉件管根令聽昇殿
管根晝夜恪勤上日明日每當顧問應對無私縱容
之次宿侍之間引經傳以發睿情搜章句以催文思

其所奉授者曲禮論語後漢書等秩卷有餘以口奉習之類不可勝計加以管根對策及第之後七箇年于今也准之前例謂爲晚成况年四十三多後等輩伏願特蒙天鑒敘之上階一補成業之舊功一明侍讀之新賞寬平九年七月日

請令諸納言等共參外記狀

右臣某謹檢去寬平九年七月三日讓位詔命日大納言藤原朝臣權大納言管原朝臣等可奏可請之事且誨其趣奏之請之可宣可行之政無誤其道宣之行之者而諸納言等疑以爲奏請宣行自非兩臣

更不可勤臣再三反覆詔旨云云奏請之人雖稱所指尋常之務無止諸卿加以臣業有文書欲伺閑以傳授身非木石思寄暇而攝治藤原朝臣獨自從政何堪每日頻參之役伏願太上皇陛下述去年詔命之意察今日申請之誠宣喻諸納言等相其令參外記然則庶務繁多暫無擁滯羣臣激勵俱致恪勤昌泰元年九月四日權大納言正三位兼行右近衛大將民部卿中宮大夫管原

決諸納言所疑狀

臣某謹言伏奉今月十八日勅旨諸納言之所疑一

朝冰解讓位詔之攸指千載日明臣素性雖劣丹誠最深奏請宣行盡忠不敢迴避養身傳業隨狀將得優游臣悅至焉臣願足矣昌泰元年九月十九日

請罷右近衛大將狀

右臣某出身儒館偷職武官三四年來罪深責重伏願聖主陛下曲降鴻慈罷臣大將不勝惻切之至修狀以聞昌泰三年二月六日

爲藤大納言辭右近衛大將表

臣氏宗言臣伏奉恩制得備宿衛光寵自天懼心無地臣誠惶誠恐頓首頓首死罪死罪臣才非文武智

謝股肱忝假納言之名空竊大將之號一以慙於過
分一以耻於非據况乎桑榆景暮蒲柳氣衰僅可陪
縉紳之臣何堪預陛戟之列仍先再修上表請解右
大將遂無聞天之聲逾益伏地之恐臣以爲甲冑未
必忠信忠信自爲甲冑望請解罷所帶避路於後賢
臣尸素可以除臣愚丹可以盡不勝懇款抗表以聞
貞觀八年十一月二十九日從三位守權大納言兼
右近衛大將藤原朝臣氏宗上表

爲大政大臣謝加年官賜隨身第一表

臣良房言伏奉今月十日勅旨賜臣以食邑如舊命

年官准三宮帶刀資人隨身兵仗等事荷恩不力銜

膽無閒

謝中

臣聞大政大臣者上理陰陽下經邦國一

人有慶師範猶施四海無波儀形自用而先帝不棄
臣庸瑣委此崇班純陽未免履冰臘月逾添流汗自
愧形影深執搗謙唯許減封三分有一又隨身兵仗
等事雖舊貫臣不敢當其仁年官則恩是新情臣未
堪爲其首故臣並固辭以視不虛受今陛下更憲章
先帝重先慰鴻私忠誠不移先後惟一臣欲推賢以
避路何私陛下公選之官將扶老以干城何分陛下
宿衛之士况比年調和不偶水旱重仍倉廩少禮節

之資城池失金湯之險故去十一年六月二十六日
聖主下勅曰服御常膳並宜減撤同年七月二日又
公卿上奏曰五位已上封祿亦暫減折其議未復其
事猶存豈君臣偏好卑謙蓋內外其待豐稔若以斯
時全食彼邑斯耻格於先帝而取嫌猜於當時也且
尸素者天奪其鑿充盈者鬼瞰其家溫飽有餘何以
忘止足年齡已暮暫欲養遊魂臣所以不奉遵公私
兼濟而已不任懇款屏營之至謹修表狀陳讓以聞
貞觀十三年四月十四日大政大臣從一位臣藤原
朝臣良房上表

爲大政大臣重謝年官隨身第三表

臣良房言去十五日中使中納言藤原朝臣

基經

至

奉宣聖旨返臣上表將遂先勅頻苦刻肌再慙蜚耳

中謝臣自謂功之輕薄鴻毛則其重萬鈞賞之深淵鰲

海則其淺三尺蓋荒年祭祀禮不必充豐歉歲威儀

事或從儉約今陛下藜羹自存王公茅土且減臣全

不食邑之意將斷先已之嫌若事不得已義可必行

五稼登年羣臣復舊然後同享所減臣願足矣又陛

下不許臣就私第賜直廬於禁中霜仗百重隨身何

用虎賁千列帶仗安施臣所以固辭亦復在此臣所

有一兩僕隸皆是陛下幼年之侍童也隨分得官者或年三四人陛下以爲慰舊功力臣以爲拜家數人未報萬乘之先恩何擬三宮以新制臣持心不重暫欲樂地中之山稟質猶輕恐不爲風下之草今不堪懇誠重表以聞貞觀十三年四月十八日

重謝年官隨身第三表

臣良房言丹款無遺紫泥不測事之嫌志之執至于再至于三臣某誠惶誠恐頓首頓首死罪臣伏惟滿而不傾者未聞百器之一器貴而能久者誰見萬家之一家臣雲漢昭回位望斯極天無咫尺恩寵有餘

臣所以固辭崇賞亦復一如前表而已殊恨桑榆景薄蒲柳秋深雖有肝膽之精勤而闕晨昏之供奉縱使臣封至連城富爲潤屋歲入之多家門可無遊用日用之費伏臘今有幾迴時不可留心不可轉臣輸陛下以忠誠無二陛下賜臣以眉壽且千又如勅旨則陛下自有忘德之嫌歸臣多以好謙之責昧死無地眉目何施而事爲國不爲義向公不向私將分憂織婦何取笑樵夫臣枯骨之餘請訓蒼昊臣寸心之重願帶黃河今不堪精誠之至累表抗聞貞觀十三年四月二十日

爲大學助教善淵朝臣永貞請解官侍母表

臣永貞言永貞當年負笈壯日成功乃心於王室之前
父手於黎民之下臣母妾今年八十有五凱風南
吹薄暮西夕盪雖三世藥雖萬金施之遊魂有何一
効臣聞侍養之道律令有文子孫盡之然後旁達臣
被天庠折終鮮兄弟臣弟少外記愛成身居顯官才
亦可用臣爲大學助教十五年來圓冠非中身之服
面丈是遊手之資羊質虎皮名留實去夫人生於三
事之如一居官以養異於委親然而君臣絕道愛敬
不可兩全朱白殊門忠孝何以兼濟臣先是帝城之

外有一小園茅屋數間草萊三徑樵蘇之費不備力
以何供藜藿之羹不假地而欲薦此是區區之尺土
足侍老母之餘年弟爰成出爲魏闕之臣臣永貞入
爲寒閨之子或家或國共是王臣伏惟聖朝爲民父
母以孝行治政不及旦暮之人恩先遍期頤之老昔
令伯爲祖母辭官晉帝無不省覽臣今爲所生解侍
陛下何敢依違縱謂臣去官請察多士之居於臣後
謂臣專孝將見求忠之心於臣門若桑榆遂落髀骨
長歸斂手足形乃盡臣節而已今不勝烏鳥之情昧
死以聞貞觀十四年

爲右大臣謝官表

臣基經言基經伏奉恩旨以去八月十五日任右大臣仰思注意望辰極以魂亡俯紆具瞻揖烝黎而顏厚臣某誠惶誠恐頓首頓首死罪死罪臣銀黃濫服菽麥彌昏欲報光寵於昊蒼更累崇班於尸素況乎禮之強仕臣齒未滿其期書之阜成臣能未及其事昔甘羅之一十餘二以多智不爲少年今微臣之三十有七以無才猶謂太早伏願陛下鴻慈聽臣愚悃退臣所帶俾槐路絕曠官之聲葺門得稅駕之地不勝至誠上表以聞貞觀十四年十月十三日

爲小野王謝別給封戶第一表

臣某言去九月二十一日勅旨賜臣百戶之封以助

齋佻之費仰承溫煦未悟比量

中謝

臣往年病發沉困

不歸謝簪纓於帝城約香火於釋眾菩提一念身雖

在艸庵之中空觀六時心未離魏闕之下大致臣合

門萬事皆隨省折灰冷之服備避風菜茹之滄資送

日若更蒙新賞猶滿舊封水石幽閑之地有嫌於貯

藏煙霞晚暮之家無節於遊用陛下寵光不翅恩之

又恩甚深臣虛受非功過而再過惟重伏願陛下察

臣丹款照臣素情卷中縉於九重留上腴之百戶臣

願足矣臣望稱焉貞觀十年十月十九日

爲小野王重謝別給封戶第二表

中使右近衛少將平朝臣正範至臣艸廬宣傳口勅
推心出言中情自見量分辭賞上表無聽臣葭莩屬
貴磐石封高將繫歎電於殘魂奄侈玄流於遺教王
臣匪躬之義念念逾眞佛子行道之勤生生何慢至
彼曉嵐蕭颯讀誦經行澗水潺湲優游自得斯則所
以陛下不咎臣入道俾成臣本願之故也何更家蓄
萬鍾空待山鬼之噉室無懸磬長失野夫之聞陛下
鴻慈願賜照察臣之幸矣不亦悅乎無勝款重累以

聞貞觀十三年十月二十五日

重謝別給封戶第三表

去月二十六日中使左近衛少將藤原朝臣有實至
謹奉勅答宣喻殷勤淚汗俱下中謝臣昔帶職從事之

日冠蓋無非聖恩今移病出家之時衣鉢皆是官施
一死一生或出或處若負恩德明神殛之臣伏案去
十月二十三日施行詔書勸督州吏掩水傷之尸骸
收拾郡民復風害之徭役自古聖帝明王未聞無災
唯在克己復禮謂之有道而已方今如綸命之旨養
臣以孔襄之親陛下既憂國家小臣豈安寢夢嗟虜

臣鄉栽松竹寒而不可裁衣產業香華飢而不可充
食然猶庶幾手掬山碗以備粗稅之逋懸肩舁野蔬
以助黎民之炊爨曷爲當此有損之年空受無功之
賞使陛下取名於私親小臣忘義於知止縱天下譏
不載于口而臣獨自不懼于心乎伏望特賜優恕察
臣愚款臣寄生者陛下將終始於一心臣師事者世
尊何屈申於兩舌不敢飾謙恐處違勅慈悲哀愍必
垂聽許不堪悃誠之至重以上表拜聞貞觀十六年
十一月

爲式部卿請罷所職表

臣忠良言中使官姓名至宣傳口勅抒臣退官之情
加以溫慰之辭臣位高二品年迫六旬寵光之恩甚
深報國之力既屈亦氣離魂魄王母甫降而不治病
結膏肓扁鵲重產而何益望闕嗚咽冠帶不由命矣
皇天使臣固疾伏願陛下內照睿情外顧人議以賜
優放爲臣長生之術以察愚誠爲臣不死之藥不堪
悃款重累抗聞

爲右大臣重請被停攝政表

臣基經言中使右近衛權中將藤原朝臣山陰至奉
傳勅旨仰止臣請不知愚款之乖聖懷更疑微誠之

逸天聽臣某誠惶誠恐頓首頓首死罪死罪臣位貴
官重皆是陛下之殊私祿厚封高亦復陛下之絕寵
殊恨淹引日月偷安非服不意綸命乍降屬以重寄
縱令陛下責臣以有一割之刀而復臣訴陛下以無
再全之錦不獨顧身亦能思國以臣思國之慮將盡
報主之情陛下推而察之莫重臣罪臣以爲春蒼夏
昊猶是一天朝東暮西未爲兩日伏願臣心不離魏
闕將致今上臣子之忠臣身常侍仙階不死亡叔臨
終之命臣謹檢故事皇帝之母必升尊位又察前修
幼主之代太后臨朝陛下若寶重天下憂思幼主則

皇母尊位之後乃許臨朝之儀臣竭力施功不敢懈
緩臣誠盡矣臣願足焉不堪悃款之至累表上聞貞
觀十八年十二月五日

爲南大納言致仕表

臣年名言臣聞年滿致仕人臣之禮也氣衰發病人
生之命也氣衰年滿臣既知之知而忘之未免重責
中謝臣位升三品職至納言前兢却惕冰淵意危昨是
今非犬馬齒截臣平生以爲性雖愚蒙止足之分不
敢踰矩力雖喘息貪進之間不敢從心至于陛下卽
位春秋甚富臣不忍逐孤雲以歸骸骨苟且延數日

而報國家豈圖心事不諧因病乍發淹沉未幾魂氣如離臣自謂茅土封高皇天降譴於陰罪康衢漏盡冥鑑結罪於夜行臣八百戶之恩死而不朽臣七十年之壽生以幾時伏願陛下賜臣放歸優臣告老以聞恩許爲藥石之效以蒙勅裕爲招復之方臣欲荷表函以奏闕下起居不辨冠帶無由故謹遣男從五位下內藏助良臣抗表以聞貞觀十九年四月八日奉勅重上請不減御封表

臣諱言伏奉勅旨減折御封不恭承而止畏切棲冰欲拊默以從誠虧底露謝臣聞天之與人孝子業在

諧命事之隨理愚夫慎其有常故一天下之至尊臣
不拒前勅於童稚二千戶之甚少臣能稽舊章於志
成而今枉降中使重敎睿情纔納半封更增措搃臣
謹計入租伏量輸貢若任土非實恐支用或虛陛下
縱損全數雖有撝謙之德臣遂從折分既忘愛禮之
義况皇天貴誠不貴物臣子爲道不爲身陛下臣之
皇天也請將盡誠於方寸臣陛下之臣子也請不失
道於小銖伏願鴻慈迴照鑒臣血誠仰雲霄以競惕
流汗臨淵谷以累表抗聞元慶三年二月十七日

爲公卿賀朔冬至表

臣基經等言臣聞潛鱗游泳樂春水於和風稚羽來
賓拂曉雲於秋月彼微情之二物猶感奉天況在位
之羣臣誰忘欽化臣某等誠歡誠喜頓首頓首死罪
死罪夫三象知誠四騶得道斯乃寒溫之平也雙離
合璧五緯連珠斯乃聖哲之事也臣等謹案歷曰十
一月丙辰朔旦冬至稽之舊章理誠宜賀伏惟皇帝
陛下欽若無掩昇惟馨於昊天敬授不偷襲其臭於
黎庶益古先帝之希有舊史氏之所罕言陛下所得
之明德至矣猗歟日則南至陛下向陽之美可觀星
惟北拱臣等詣闕之誠何切聖壽無疆明時有瑞不

勝抃舞拜表以聞元慶三年十一月一日

爲尙侍源朝臣全姬請罷職表

妾全姬謹言妾先陳惻誠請解所職重年遠隔單素
難通一二年來逾增顏厚今妾位崇三品齡迫七旬
將假脂粉以從事紫闥非扶杖之庭欲催綺羅以勤
公丹悃慙懸車之義妾不敢謙退白日惟明妾亦無
飾詞蒼天在上伏願殊垂降鑒聽妾誠請避高班於
賢路養殘氣於幽閨妾全姬誠惶誠恐頓首頓首死
罪死罪謹言元慶四年

以上見日本圖經

僧空海

空海拾遺卷七十二有傳

獻書表

劉希夷集四卷右伏奉小內記大伴氏上宣書取奉
進但恐久韞揮翰筆不勝意不勉強書空汗珍紙王
昌齡詩格一卷此是在唐之日於作者邊偶得此書
古詩格等雖有數家近代才子切愛此格當今堯日
麗天薰風通地垂拱無爲頌德溢街不任手足敢以
奉進庶令屬文士知見之矣還恐招耻遼豕貞元英
傑六言詩三卷元是一卷綠書樣大卷則隨大今分
三卷文是秀逸之文書則褚臨王之遺體也比屬臨

池之次寫得奉上飛白書一卷亦是在唐之日一見此體試書之虎變爲犬雖未成功夫比之獻芹伏願天慈曲垂一覽不任葵藿之至謹遣弟子僧實慧謹隨狀奉進輕贖宸嚴伏深戰汗謹進弘仁二年六月二十七日

獻墨本十部表

德宗皇帝眞蹟一卷歐陽詢眞跡一卷大王諸舍帖一首不空三藏碑一首岸和尚碑一鋪徐侍郎寶林寺詩一卷釋令起八分書一帖謂之行草一卷鳥獸飛白一卷右雖輕乏敢表丹誠但恐輕塵聖覽招耻

遼豕謹隨狀謹進弘仁二年八月沙門空海進

獻狸毛筆表

狸毛筆四管眞書一行書一草書一寫書一右伏奉
昨日進止且教筆生坂井名清川造得奉進空海於
海西所聽見如此其中大小長短強柔齊尖者隨字
勢麤細總取捨而已簡毛之法纏紙之要深墨藏用
並家傳授訖空海自家試看新作者不減唐家但恐
星好各別不允聖愛自外八分小書之樣搨書臨書
之式雖未見作得具足口授耳謹附清川奉進不宣
謹進弘仁三年六月七日

獻雜文表

急就章一卷王昌齡集一卷雜詩集四卷朱晝一詩
卷朱千乘一卷雜文一卷王智章一卷讚一卷詔一
卷勅一卷繹經圖記一卷右伏承昨日進止隨探得
且奉進所遺表啟等零在他處今見令人覓取來則
馳奉夫尺水本無萬里之鯤培塿何有千丈之幹空
海瓦礫之人謬絨燕石不謂聖聰索金聲於芻蕘訪
華藤於朽樞雖喜聖綸之下徹還慙亭帚之愆過謹
隨狀奉進輕贖聖覽伏深戰越謹進弘仁三年七月
二十九日沙門空海進

獻梵字并雜文表

沙門空海言空海聞帝道感天則秘錄必顯皇風動地則靈文聿興故能龍卦龜文待黃犧以標用鳳書虎字俟白姬以呈體於焉結繩廢而三墳燦爛刻木寢以五典鬱興明皇因之而弘風揚化蒼生仰之而知往察來不出戶庭萬里對目不因聖智三才窮數稽古溫故自我垂範非書而何矣况復悉曇之妙章梵書之字母體凝先佛理含眾智所以三世覺滿尊而爲十方方薩陲重逾身命滿界之寶半偈難報累劫之障一念易斷文字之義用大哉遠哉伏惟皇帝

陛下貫三表號減五稱首道邁規矩明齊烏兔露沉
文下六合無爲風動琴上一人垂拱玉燭調化金鏡
照耀所謂輪瑞之運于今見矣空海人是瓦礫每仰
金仙之風器謝巢許久臥堯帝之雲窟觀餘暇時學
印度之文茶湯坐來乍閱震旦之書每見蒼史古篆
右軍今隸務光韭葉杜氏艸勢未嘗不野心忘憂山
情含笑諺日奴口甘郎舌甜敢因斯義欲獻久矣然
猶狼籍汗穢還恐觸塵聖眼微誠潛達先聞于天伏
奉布勢海口勅欣踊繕裝古今文字讚右軍蘭亭碑
及梵字悉曇等書都一十卷敢以奉進伏乞天慈不

嫌涓滴一覽飛塵伏願陛下披梵字梵天之護森
羅再閱神書神人之衛逼側達水遙浦忽入封疆嵩
山復岫來受正朔常住之字加持不壞之體遂古之
民擊耕於今辰矣龍瑞紀官永豫枯射鳳祥名職放
曠金閣輕黷旒展伏深戰越沙門空海誠惶誠恐謹
言梵字悉曇字母并釋義一卷古今文字讚三卷古
今篆隸文體一卷梁武帝草書評一卷王右軍蘭亭
碑一卷曇一律師碑銘一卷弘仁五年閏七月八日
沙門空海進

獻詩表

沙門空海言去六月二十七日主殿助布勢海將五
彩吳綾錦緣五尺屏風四帖到山房來奉宣聖旨令
空海書兩卷古今詩人秀句者忽奉天命驚悚難喻
中略對山握管觸物有興自然之應不覺吟咏輒抽十
韻敢書于後伏乞天慈宥其罪過幸甚幸甚謹所書
屏風及秀句本隨表奉進輕贖聖覽伏增流汗沙門
空海誠惶誠恐謹言弘仁七年八月十五日

日本圖
經引宏

法大師
正傳

觀賢

觀賢日本僧

奉勘空海遺蹟狀

勘申眞言根本阿闍梨入唐求得法文冊子三十帖
如本可納本寺經藏令宗長者代代相承之事右就
眞言一宗伏檢舊迹根本阿闍梨贈大僧正法印大
和尚空海去延厯末銜詔入唐大同元年歸我本朝
弘仁十一年十月二十日皇帝御書賜大法師位任
內供奉十禪師天長元年祈雨有感超少僧都以同
年六月六日任造東寺別當且行造寺之事且興眞
言之教卽表請東寺爲眞言寺入唐請來佛舍利法
文道具及唐阿闍梨付屬物等收置東寺經藏傳法

供家宛如私室以同七年轉任大僧都和尙能知終
期東寺之事一向委付弟子律師實慧以去承和元
年追終焉之地歸高野山同二年三月二十一日厥
世間味樂寂滅理朝露永盡夜松獨遺惟時件冊子
法文等更不隨身厥後律師實慧爲宗僧綱守先師
迹次轉少僧都具建行宗事次同弟子僧正眞濟爲
宗之長進止宗事此兩代間堅收東寺都不移動次
根本阿闍梨舍弟子貞觀寺眞雅僧正以慧宿大法
師爲經藏預請度披見僧正以去貞觀十八年六月
六日令權律姊眞然請收件法文之日如本可返納

東寺之口仰畢遂至元慶三年正月三日奄然入滅
須件法文如僧正教返納東寺而真然僧正爲少僧
都與宗叡僧正共行宗事兩人不和件冊子法文不
返納東寺稱是先師隨身法文隨身持去高野住山
二三年此間轉任大僧都至元慶八年在京僧正永
入寂滅住山僧都轉任僧正獨出守道無傍領宗正
餘年晚暮寬平之初遂歸本山爰請申云公家初置
山座主壽長大法師是其元也以同三年九月黃葉
易散泉流難停也壽長堅閉山持件法文次座主權
律師無空每常隨身往還山城無空去延喜十六年

於圓提寺卒去之後觀賢件冊子早可返納東寺之
由告知彼弟子僧等而左右遁申都不進納爰具注
事由奏聞河原院卽召彼弟子僧殊下勘責取出所
給也若非法皇御德於凡僧等中殆令紛失此卽以
根本重物置杖葉輕處之所致也觀賢去貞觀十年
生年十五就貞觀寺眞雅僧正爲師承仕同十四年
受具足戒然則十年以往之事依文書見以傳言十
一年以後事住貞觀寺所見聞也今或人申云件法
文元來在高野者此後生人只見元慶以來近事不
知貞觀以往舊事任心偏申也又如圓仁產主法文

收彼私室不收延歷寺者此又不例何者圓仁是後
出之座主吾師是在初闡製彼山以最初座主傳教
大師入唐求得天台法文收延歷寺代代座主相承
傳寺此宗亦爾以根本闡製入唐請來真言法文收
東寺代代宗長相傳護來至後後人人所持法文收
私室此尤可然何以他宗末人例同宗本師乎寔以
根本一師之後枝葉繁茂別居之寺雖有其員東寺
是根本自餘皆枝葉今以件法文置根本一所枝葉
諸寺自然歸仰設令先師以件法文隨身雖云留山
今至末世護持人乏門徒僧綱宗之長者取出護持

更有何妨况元來收東寺今亦本所代代宗長者相承者此尤可叶先師本意也觀賢以愚昧之質忝爲宗長者就先師遺蹟盍尋其本意乎以前依仰旨勘申如件延喜十九年十一月九日

日本圖經

闕名

釋迦佛造像記

法興元世一年歲次辛巳十二月鬼前太后崩明年正月廿二日上宮法皇執病弗念子食王后仍以勞口並着於床時王后王子等及與諸臣深懷愁毒共相發願仰依三寶當造釋像口尊王身蒙此願力轉

病延壽安住世間若是定業以背世者往登淨土早
昇妙乘二月廿一日癸酉王后卽世翌日法皇登遐
癸未年三月中如願敬造釋迦尊像并口侍及莊嚴
具竟乘斯微福信道知識現在安隱出生入死隨奉
三主紹隆三寶遂其彼岸普遍六道法異念口得脫
苦緣同趣菩提使司馬鞍首止利佛師造 日本圖經